



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Joannis Pierii Valeriani Bellunensis Hieroglyphica, Sive De
Sacris Ægyptiorum Aliarumque Gentium Literis,
Commentariorum Libri LVIII**

Valeriano, Pierio

[Lipsiae] ; Francofurti Ad Moenum, 1678

Ærumnæ.

urn:nbn:de:hbz:466:1-14259

Quemadmodum autem fontesque fluviique omnes in mare decurrunt, ita nos dictionis ordo devexit in pelagus. Ut vero loco hoc ea prætereamus, quæ multa super mari ex Ægyptiorum doctrina in Pisce differuimus: contenti nunc erimus aliquot locis, quos ex Divinis literis eruimus.

PERDITIO. CAP. XXIV.

Id vero cum primis proprium est maris significatum, ut perditionis indicium sit. ob ipsam quippe profunditatem: utpote quæ idonea admodum sit ad suffocandum. Quanquam alia de causa Mare apud Ægyptios pro pernicie ponebatur, ut suo loco docuimus. Quod ad perditionem attinet, eo significato Theologi Prophetam ajunt Psalm. XVII. canere, se de aquis multis educum. Passim vero interpretes, Exundantes fluctus pro Calamitatum excessu accipiunt: & per turbulentas aquas suprema quedam doloris ostenditur vehementia, quæ omnem respirandi facultatem exuperat: ut Psalm. 68. affixum se clamat in profundo luto, unde nulla se vi possit expedire, rapidissimis demum vorticibus advoratum, in imam maris sedem dejectum esse: in quem usque locum tempestas etiam accedat, quæ arenas omnes æstu commisceat atque perturbet, qua quidem nulla major describi potest inquietudo: primo enim aquarum, in quas deciderit, ponit altitudinem, mox limum cui affixus inhaerescat, inde maris amaritudinem, & immensas undas, postremo eas sævis tempestatibus agitata: merito itaque paulo post se de profundo hujusmodi liberari supplicat, ne tanta rerum vexatus perturbatio ne deficiat.

HOSTILIS IMPETUS. CAP. XXV.

Apud eundem hostilis impetus, & subitanea quædam oppressio, per aquam indicatur, Psalm. 123. Cum exacerbatus eorum furor in nos debaccharetur, sive aqua demersisset nos, quod ut magis exasperaret, addit, Torrentem pertransiit anima nostra, ubi impetuosos inexpectatosque hostium insultus incurfu repentino proruentes, torrenti turgido comparavit, quem tamen auxilio Dei fretus tuto pertransierit: & quasi parum adhuc dixisset superaddidit. Sane pertransiit anima nostra aquam intolerabilem, ingentes quippe rerum difficultates atque pericula. Tale aliquid apud Maronem legas:

Diluvio ex illo tot vasa per aquora velli.

Idemque alibi nubem belli dixit, utrumque desumptum ex Pindaro. In Isthmiis enim ἐν πολυφύρῳ αὐλαίς διὰς ἡμεῶν. & alibi διὰς ἐν ἑσπέρῃ φέλα. Apud oratores historicosque, turbines & procellas sæpe pro bello positas invenias. Causa vero cur aqua vehementiores indicet ærumnas, ea est, quod pericula casusque reliqui corpus soleant ex una aliqua parte labefactare: aqua vero universo statim corpori circumfusa, omnibus evestigio membris impedimento est, atque undique oggerit difficultatem atque molestiam.

ÆRUMNÆ. CAP. XXVI.

Hinc Psalm. 87. ubi legitur: Omnes fluctus tuos induxisti super me, interpretes per fluctus, perturbaciones & ærumnas omnes intelligunt, quæcunque affligere possunt humanum genus, quibus omnibus Christi esset humanitas obnoxia: in ejus enim persona dictum id autemant. Fluctuare autem verbum sæpe pro Perturbari ponitur. Sedenim aliquando pro timore posita fluctuatio, ut Psalm. 61. Ecce enim ipse Deus meus, & adiutor meus est, quare non amplius fluctuabo: id est, nihil est quod ulterius pertimescam.

DILUVIUM. CAP. XXVII.

Accedit huc diluvium, de quo Psalm. 28. Dominus diluvium inhabitare facit, sive ut alii reddidere, Diluvium sedat, vel, Tempore diluvii regnum obtinuit. Utcumque significatum ad humanam pertinet salutem, quoniam hic gentes intelliguntur, quæ suarum inundatione cupiditatum, in vitiorum pelago, & humanorum affectuum voraginibus demersæ definebantur, quæ mox à Domino exemptæ servatæque sint. Alio vero loco, Psalmo quippe 31. habetur, Diluvium aquarum multarum proxime ad eum non accedat: per hujusmodi aquas supra modum exundantes, tum scilicet excrefcentia ripas flumina prætereunt, vel mare turgidum per littora spatiat, quas supra memoravimus calamitates intelligi voluit. Ita Euthymius & plerique alii sentiunt.